

Bouxvunz Gou Ceiq Boiqfug Ndeu

我最佩服的一个人

环江毛南族自治县思恩镇清潭小学五年级 罗静芳

Danghnaeuz cam gou bouxlawz hawj gou ceiq boiqfug? Gou itdingh gangj dwg daxmeh gou.

Daxmeh gou dwg boux vunz gig bingzciengz ndeu. Hoeng youq ndaw sim gou, de dauqfanj hawj gou ceiq boiqfug. Daxmeh miz doiq lwgda ndongqliklik ndeu, aenndaeng de gig ndei yawj, gyauej byoem de ndaemndwtndwt. Gou gig gyaed daxmeh gou.

Daxboh gou itcig youq baihog dajgoeng, ndigah saehcingz ndaw ranz cungj gauq daxmeh boux ndeu gag guh.

Meh gou gig gingqcoengh bouxlaux. Miz baez ndeu, daxbuz mbouj siusim fwngz deng gvej lwed lo, daxmeh gipmuengz bang daxbuz suek ndei diegsieng. Aenvih sieng naek, yienznaeuz lwed dingz

lo, fwngz daxbuz lij caengz gag doengh ndaej. Vihneix, baez daengz gwnhaeux, daxmeh cungj sien bwnq daxbuz gwn. Caj daxbuz gwn imq le, daxmeh caiq gwnhaeux seiz, ngaizbyaek cungj liengz lo. Moix baez yawj daengz yienghneix, gou cungj deng daxmeh yienghneix hauqswnh gamjdoengh dangq-maz. Gou siengj: Gou wnggai vih daxmeh lai guh di saeh, hawj daxmeh mbouj sinhoj, lai yietnaiq. Hoeng, gou guh mbouj daengz. Daxmeh lij dwg moix ngoenz nyaengq daengz byonghwnz, ranz caengz rongh couh hwnqcong z guh hongranz lo. Daxbuz gou baez raen vunz cungj haenh: "Gou naengz miz lwgbawx ndei neix, caen dwg ciuhgonq gou miz fukfaenh ha!"

Daxmeh couh dwg bouxvunz yienghneix, youh



ciuqgoq daxbuz, youh ciuqgoq gou, coengzlaiz mbouj gangj gijmaz hoj.

Gou caen boiqfug Daxmeh gou.

(指导老师: 彭凤如)

Haenhhaenh Doengzhag Gou

夸夸我的同学

贵港市覃塘区蒙公乡高占小学三年级 陆一泓



Gou miz boux doengz-hag ndeu heuh guh Linz Meimei, doiq lwgda de gig hung, yaepmyab yaepmyab, gwnz faj naj luenzlulu haenx ciengzciengz venj miz song aen ulaeuj, dwggayez raix-caix.

De dwg boux cujcanj gig saeqsim ndeu, bouxlawz sij cih soq loek roxnaeuz suenq diuz daez loek, de

cungj "vat" ndaej okdaeuj, lij lumj boux lauxsae iq ityiengh son mwngz baenzlawz gaijsij giz loek, mbouj lumj miz-mbangj cujcanj iq, "ndongq da he laep da he", siengj leix couh leix, mbouj siengj leix couh mbouj leix, gangj de dwg boux cujcanj iq saeqsim, mbouj gangj loek ba!

De mboujdanh dwg boux cujcanj iq saeqsim, lij dwg dahsau gyaed caeuq bouxwnq faen gwn dem. Geiqndaej miz baez ndeu, de daiq geij aen makleiz daeuj hagdangz, gig saenzmaed dwk cam gou: "Canhnh, mwngz caicai gou daiq gijmaz doxgaiq daeuj, de hoengzfwdfwd, luenzlulu, diemzsis, cai ndaej doiq

hawj mwngz."

Gou siengj yaep he naeuz: "Dwg mak bingzgoj ba?" Da nyaenj bak riu naeuz: "Yu, siengj gwn lai, mwngz lij dwg haenqrengz caiq caicai ba." Gou caj mbouj ndaej naeuz: "Aeya, mwngz couh vaiq di gangj ba." De ruihaha dwk naeuz: "Mwngz uk lai lo, aeu aen ndaeng nyaeuqnyaueq ba." De daj ndaw daehsaw gaem song aen makleiz henjrwgrw okdaeuj, yienh aen he hawj gou, dou itheij gwn mak, mizfeih cubcub, haisim lai lo.

Mwngz naeuz cungj doengzhag neix cig mbouj cig ndaej haenh ne?

(指导老师: 覃珍团)

Seizcin Daeuj lo

春天来了

武鸣县太平镇庆乐小学二年级 何琪

Seizcin daeuj lo, seizcin daeuj lo, dauqcawq cungj dwg vava loegloeg, dauqcawq cungj dwg nauhnauh yiedyied! Mwngz yawj, aen daengngoengz ciuq dwk gwnz dieg raeujrubrub! Gorum iq daj laj namh yo gyauej okdaeuj, gofaex hix did ok didi nga oi, vadauz, valeiz hix venj rim gwnz nyefaex, gij saek ronghlwenq gyaundeiz gvaq dahsau iq! Dingqnyi duz roegenq heuh cici caca, duz bitlwg hix vaiq buet daengz ndaw dah, youz bae youz dauq, vaiqvued raixcaix! Duzgvej itmienh diuqyet diuqyet, itmienh ciengqgo, gyoengqde lumj naeuz ciengq: Seizcin daeuj lo, gingjsaek seizcin caen gyaundeiz!

(指导老师: 黄华明)



Rumzcin cififi, mbwn lij miz di nit, haetromh gou daeujdaengz hagdangz, ngamq fwndoeq gvaq, dienheiq caen ndei.

Gou byaij haeuj hagdangz daeuj, dangqna j miz faq ciengz hungsang ndeu, gwnz ciengz veh miz Cangz-cwngz hungsang raezrang, seiqhenz faexcueng hoengzfwg, couhlumj benq fwjhaet ronghsag nei, moix ngoenz gyoengq doengzhag yawjraen de cungj gamjdaengz cingsaenz bakboix. Baihnaj faqciengz miz baiz faexcaujbit ndeu, yawj gvaqbae yienznaeuz de mbouj suenq sang, hoeng go go maj ndaej cingjcingj caezcaez, gij mbawfaex heuswdswd, yawj gvaqbae couh lumj gaiqgaiq "caujbit" dingj hwnj mbwn bae. Song henz faqciengz hung faenbied miz baiz va giuznyungz ndeu, gyoengqde deng raed dwk bingzbwdbwd, lengq dujva gaenq hai



lo, duj duj nyungzyubyub hoengzujuj caen dwggayez, sawj mwngz caen siengj gop de youq ndaw fwngz, bungj haeuj henz naj daeuj gamjsouh gij nyungzyubyub de.

Gou byaij bae naj, dangqna j sawqmwh gvangqyub hailangh, gwnz cuzgiuzcangz gij nywj bingzbwdbwd,

aenvih dwg cocin, gij nywj vanzlij mboujcaengz did ndaej mwn, yawj gvaqbae benq neix heuswd, benq haenx buenq heu buenq henj, miz geij duzroeg cingq youq gwnz diegnywj ra gwn, yaepndeuz byaij ndaej vaiqvuet, yaepndeuz dingh ndwn youq, sawqmwh youh baenz raq mbin hwnjdaeuj, sawj

mwngz gamjdaengz neix couhdwg fuk dozveh gyaundeiz ndawfwngz cangh-dajveh. Doiqmienh giuzcangz miz baiz faex hungsang ndeu, daihgaiq miz cib geij go ba! Gou hix mbouj rox de dwg faex gijmaz, gou roxnyinh de maj ndaej gig miz eiqsei, gij nyefaex hopheux ganjfaex did okdaeuj, daj laj daengz gwnz baez caengz baez caengz mbouj luenh saek di. Youq benq diegnywj iq ndeu, maj song go faex-siglouz, nye faex cien diuz fanh diuz deihaenyaen, gwnz nyefaex did ok gij mbawfaex hoengzoiq iq. Mbawfaex yienznaeuz iq, hoeng moix mbaw cungj youzlwenz youzlwenz, couhlumj daz caengz youz ndeu nei.

Hagdangz raeuz vanzlij miz hauilai gingjsaek gyaundeiz dem, gou ndaej youq neix hagsib swnghhoz dwg geijlai vuenyungz ha!

(指导老师: 陆全耀 林锦凤)